

Headlines

- 1 लोकसभा चुनावों के 5^{मं} गेड़ जेहदे तैहत् बरामुला चुनावी हल्के च बी वोट पोआए जांगन, लेई जारी प्रचार अभियान अज्ज मुक्की गोआ।
- 2 प्रधानमंत्री नरेन्द्र मोदी होरें गलाया ऐ जे दफा 370 दे हटने मगरा कश्मीर विकास दी बत्ता उप्पर अगड़ा बधा'रदा ऐ।
- 3 पुंछ जिले च 25 मई गी होने आले चुनावों गी दिक्खदे होई वोटरें लेई आपात योजना तैआर कीती गई ऐ।
- 4 जम्मू खित्ते च गर्मी दा प्रकोप जारी, मौसम विभाग नै इस म्हीने दी खीरे तगर मौसम दे खुश्क रौहने दी पेशगोई कीती ऐ।

**Campaign**

लोकसभा चुनावों के 5^{मं} गेड़ लेई जारी प्रचार मुहिम अज्ज मुक्की गोआ, इससै गेड़ तैहत् बरामुला चुनावी हल्के च वोट पोआए जांगन। 49 लोकसभा सीटें जिंदे च बिहार दियां 5, झारखंड दिएं 3, महाराष्ट्र दियां 13, ओडिशा दियां 5, उत्तर प्रदेश दी 14, पच्छिम बंगाल 7 ते केन्द्र शासत प्रदेश जम्मू कश्मीर ते लद्दाख दी 1-1 सीटें उप्पर 20 मई गी वोट पोआए जांगन। बरामुला चुनावी हल्के थमां 22 मेदवार चुनावों मैदान च न। पर मुख्क मकाबला नैशनल कांफ्रेंस दे उप-प्रधान उमर अब्दुल्ला जेकेपीसी दे प्रधान सज्जाद गनी लोन ते तिहार जेल च बंद इंजीनियर रशीद हुंदे बश्कार ऐ। इस लोकसभा चुनावी हल्के च चऊं जिलें कुपवाड़ा, बरामुला, बांदीपोरा ते बडगाम दियां 18 विधानसभा क्षेत्र शामिल न। 2019 ब'रे दे चुनावें च 4 लक्ख 57 ज्हार 931 वोट पे हे, जिंदे चा सब्बै शा मते वोट 1 लक्ख 33 ज्हार 426 वोट नैशनल कांफ्रेंस दे एम.ए.लोन होरें हासल कीते हे, उंदे मगरा पीपल्स कांफ्रेंस दे राजा एजाज अली होरें 1 लक्ख 31 ज्हार 193 वोट हासल कीते ते इंजीनियर रशीद गी 1 लक्ख 21 ज्हार 168 वोट हासल कीते हे। उआं इस बारी 3 दहाके मगरा चुनावें दा पूरा मंजर बदली गोआ ऐ। बरामुला च बक्ख-बक्ख रैलियां ते रोड शो होआ8रदे न ते लोकें च वोट पाने गी लेइयै बड़ा मता चाह दिक्खने गी लब्भा'रदा ऐ। जम्मू कश्मीर थमां दफा 370 दे हटने मगरा एह पैहले लोकसभा चुनावों न।

**Baramula**

लोकसभा चुनावों के 5^{मं} गेड़ तैहत् 6 राज्यें ते दो केन्द्र शासत प्रदेशें च औंदी 20 मई गी 49 लोकसभा सीटें लेई वोट पोआए जाने न। एहदे तैहत् 26 ज्हार पंजीकृत कश्मीरी पंडत मतदाताएं शा 18 ज्हार शा मते विस्थापत वोटरें गी अपने वोट पाने दे हक्क दा इस्तेमाल करगंन। आकाशवाणी जम्मू दे संवाददाता होरें जानकारी दित्ती ऐ जे बरामुला-कुपवाड़ा हल्के च 26 ज्हार विस्थापत वोटरें चा 12 ज्हार 926 मर्द ते 13 ज्हार 74 महिला वोटर न। 18 ज्हार वोटरें

गी चुनां अधिकारिणं आस्सेआ अपडेट कीता गेदा ऐ जेहड़े औंदी 20 मई गी वोट पांगन। चुनां प्रशासन नै विस्थापत वोटरें लेई 29 मतदान केन्द्र स्थापत कीते न, जिंदे चा 24 जम्मू च, 4 दिल्ली ते 1 मतदान केन्द्र उधमपुर च ऐ। दिल्ली च कश्मीरी पंडत वोटरें लेई बडलै 6 बजे शा संजा 6 बजे तगर पिक एंड ड्राप दी सुविधा बी उपलब्ध होग। चुनां प्रशासन नै इस बारी इस गल्ला गी जकीनी बनाने दे पूरे जतन कीते न, मते शा मते विस्थापत वोटर अपने वोट पाने दे हक्क दा इस्तेमाल करी सकन। पिछली बारी केई विस्थापत वोटरें दा नां मतदाता सूचिणं च नेई हा। जम्मू च बी विस्थाप वोटरें लेई जगटी, उदयवाला ते बोहड़ी च मतदान केन्द्र स्थापत कीते गेदे न।

<><><><><><>

Modi-370

प्रधानमंत्री ते बीजेपी दे वरिष्ठ नेता नरेन्द्र मोदी होरें आखेआ ऐ जे केन्द्र च इक मजबूत सरकार होने करी गै दफा-370 दी कंध गी त्रोड़ेआ जाई सकेआ ऐ ते नतीजन हुन कश्मीर तेज रफतार कन्नै विकास-बाद्धे दी बत्ता पर अगड़ा बधै करदा ऐ। अज्ज हरियाणा च इक चुनावी रैली गी संबोधत करदे होई मोदी होरें आखेआ जे अगस्त 2019 च भारती जनता पार्टी दी अगुवाई आली केन्द्र सरकार नै दफा-370 दे प्रावधानें गी हटाई दित्ता हा। उनें दावा कीता जे इक गैह कन्नै प्रदेश च रमानदारी स्थापत करने च मती मदाद हासल होई ऐ। उनें दोष लाया जे कांग्रेस पार्टी नै वोट बैंक दी सियासत लेई राष्ट्री सुरक्षा कन्नै समझौता कीता।

<><><><><><>

NC-Omar

जम्मू कश्मीर दे साबका मुख्मन्त्री ते नैशन कांफ्रेंस दे वरिष्ठ नेता उमर अब्दुल्ला होरें दोष लाया ऐ जे गृहमन्त्री अमित शाह होरें लोकसभा चुनाणं च नैशनल कांफ्रेंस दे मेदवारें दी हार जकीनी बनाने दे इक मात्तर एजेंडें कन्नै प्रदेश दा दौरा लाया ऐ। उमर होरें दावा बन्नेआ जे शाह हुंदे दौरे दा मकसद प्रशासन, बीजेपी ते ओहूदे भ्याल दलें गी निर्देश देना हा जे नैशनल कांफ्रेंस गी किस चाल्ली हराया जा। उमर होर पीपुल्स कांफ्रेंस, अपनी पार्टी, डैमोक्रेटिक प्रोग्रैसिव आजाद पार्टी ते पीडीपी पर लगातार जबानी हमला करदे आवैरदे ते ओहू इनें पार्टिणं पर बीजेपी कन्नै रलने दा बी इल्जाम लाह करदे न।

<><><><><><>

Bus Accident

हरियाणा च जंदी रातीं इक बस च अगग लग्गी जाने कारण घट्टोघट्ट 8एं जनें दी मौत होई गई ऐ। एह दर्दनाक हादसा उसलै पेश आया जिसलै जे जालंधर थमां मथुरा जा'रदी इक बस च चानचक्क अगग लग्गी गई। हादसे च 24 सुआरियां बुरी चाल्ली जख्मी न जिंदा अस्पताले च इलाज चलै करदा ऐ। इस यात्री बस च पंजाब ते हरियाणा दे कोई 60 यात्री सुआर हे।

<><><><><><>

Musium

अज्ज कुल संसारी संग्रहालय दिवस मनाया जा'रदा ऐ। इस ब'रे एहदा विषे सार ऐ—शिक्षा ते शोध लेई अजैबधर जम्मू च बी अज्ज म्युसियम दिवस मनाया गेआ।

<><><><><><>

Poonch Polls

कब्जा रेखा कन्ने लगदे पुंछ सेक्टर च चुनां प्रशासन नै मतदान आले ध्याड़े पाकिस्तान आस्सेआ गोलीबारी करने दी सूरतै च चुनावी अमले ते मतदाताएं गी सुरक्षत थाहरें पर मुंतकिल करने लेई इक आपात योजना तैआर कीती ऐ। अनंतनाग—राजौरी लोकसभा हल्के हेठ औने आले पुंछ जिले च औंदी 25 मई गी वोट पाए जाने न। पुंछ दे जिला चुनां अधिकारी यासीन एम.चौधरी होरें दस्सेआ जे उंदे जिले च 3 असेंबली हल्के—मेंढर, सुरनकोट ते हवेली च कुल 474 मतदान केन्द्र बनाए गेदे न। इंदे चा 24 मतदान केन्द्र नेय न जेहड़े कब्जा रेखा दे 5 किलोमीटर दे दायरे अंदर न। इआं गै कोई 2 दर्जन शा मते मतदान केन्द्र कब्जा रेखा थमां शड़ा इक किलोमीटर दे दायरे अंदर न। मतदान गी बवस्था आले ढंगै सिर तोड़ चाढ़ने लेई लोड़चदे सब्बै हीले कीते गेदे न।

<><><><><><>

Army Commander

फौज दी उत्तरी कमान दे प्रमुख लैफिटनेंट जनरल एम.वी.सुचिंदरा कुमार होरें अज्ज दक्खनी कश्मीर च सुरक्षा स्थिति ते आतंकवाद—रोधी ग्रिड दे कम्मकाज दा जायजा लैता। सोशल नेटवर्किंग साईट एक्स पर जारी इक पोस्ट च उत्तरी कमान नै दस्सेआ जे फौजी कमांडर होरें आतंकवाद—रोधी ग्रिड ते बल दिएं कारवाइएं मतल्लक तैआरिएं बारे जानकारी दित्ती गई ऐ। फौजी कमांडर होरें बलें गी लगातार सतर्कता बनाई रखने ते दुश्मन दे भैड़े मंसूबें गी नाकाम बनाने लेई आखेआ ऐ।

<><><><><><>

Kathua

कठुआ जिले दी रौहने आली सोनम मेहता नै कनाडा दे टोरेंटो च नूरा कास्मो वर्ल्डवाइड नां दी सौंदर्य प्रतियोगिता जित्ती लैती ऐ। बक्ख—बक्ख मुख्खें थमां प्रतियोगिता च हिस्सा लैता ते कठुआ दी सोनम मेहता होरें इस खिताब गी जित्तिथै जम्मू कश्मीर दा नां रोशन कीता।

<><><><><><>

e-Buses

जम्मू च बक्ख-बक्ख रूटें पर ई-बसां चला करदे जम्मू स्मार्ट सिटी लिमिटेड नै लोकें गी खबरदार कीता ऐ जे ओह बगैर टिकटें दे ई-बसें च सफर नेई करन। सोशल मीडिया दी इक पोस्ट च जम्मू स्मार्ट सिटी लिमिटेड नै आखेआ ऐ जे ई-टिकट दे बगैरई-बसें च सफर करना अपराध ते एह्दे लेई ढाई सौ रपें शा लेइयै 500 रपें तगर दा जुर्माना लाया जाई सकदा ऐ। जम्मू स्मार्ट सिटी लिमिटेड नै आखेआ ऐ जे कुसै बी जानकारी जां मदाद लेइ लोक इनें हैल्पलाइन नंबरें पर राबता करी सकदे न। नंबर इस चाल्ली नः 1800-130-7209 ते 0191-2570570।

<><><><><><>

Darhal

राजौरी जिले दे दरहाल जंगलें च अग्ग लगने दी खबर ऐ। ताजा जानकारी मूजब कुसा जानी माल दे नुकसान अजे कोई खबर नेइं ऐ। अग्ग साहलने आला मैहकमा अग्ग साहलने लेई जतन करा'रदे न। अग्ग साहलने लेई 2 दमकल गड्डियां मौके उप्पर पुज्जी दियां न ते अग्ग उप्पर काबू पाने दे जतन कीते जा'रदे न।

<><><><><><>

Weather

जम्मू संभाग ते एह्दे कन्नै लगदे इलाकें च पिछले किश दिनें थमां जबरदस्त गर्मी पवै करदी ऐ। पारा बधने करी दिनै दे बेल्ले बाहर बजारें च लोकें दी घट्ट आमद दिक्खी जा करदी ऐ। अज्ज तापमान 41 डिग्री सैल्सियस तगर पुज्जी गेआ ऐ। जम्मू दे भद्रवाह, बनिहाल ते बटोत जनेह् हिल स्टेशनें पर बी तापमान 30 डिग्री सैल्सियस तगर रिकार्ड कीता गेआ ऐ। मौसम विभाग नै 27 मई तगर मौसम खुश्क रौहने दी पेशगोई कीती ऐ।

<><><><><><>